

庫本祥

清陳修園著

傷寒醫訣串解

科技衛生出版社



內 容 提 要

傷寒醫訣串解六卷，是陳氏晚年融會生平對於傷寒論的研究心得，貫通要旨，辨析疑似，以串合解釋傷寒精義的，讀者可從此書獲得傷寒學的綱領，再作全面的探討。

傷寒眞方歌括六卷。陳氏概括了傷寒方劑與主治的大要，分配六經，用詩歌形式表達出來，以便讀者記誦。並有方註及證候辨治方法，尤便參照學習。

這兩本書都是學習傷寒論的初步讀物，有相當的輔助作用，茲從陳氏叢書中抽出單行，以供需要。

傷寒醫訣串解 傷寒眞方歌括

清 陳修園 著

*

科技衛生出版社出版

(上海南京西路2004號)

上海市書刊出版業營業許可證出 093 號

上海市印刷四廠印刷 新华书店上海發行所總經售

*

開本 787×1092 耗 1/32 · 印張 3 3/4 字數 67,000

1958年11月新1版 1958年11月第1次印刷

印數 1—8,500

統一書號：14 · 541

定價：(9)0.44 元

序

傷寒醫訣串解者。長樂陳修園先生晚年所編集也。惜六篇之中尙缺其一。以其未成書。故不及付梓。其門徒猶子陳道著。有盧扁風。閩之名醫也。既能學先生之學。又能承先生之志。日嘗手披而祕藏之。復體會其遺意而敬續一篇以補其缺。合成六篇。而篇帙遂成。茲修園古矣。其猶子道著亦古矣。閩中林子壽。專心衛世。於舊書肆中。檢得修園先生註解葛可久十藥神書一卷。購而珍存之。并恐此二種沒而不彰。因細加讎校。韻而錄之。欲與兩先生傳名。兼以傳世。值余奉命巡撫全閩。因舊疾復起。探知林子精於療治。常勞診視。論及閩中名醫。林子以陳修園陳道著兩先生對。敬以修園先生所著南雅堂十一種醫書見示。且余本善病人也。又耳熟是書久矣。適林子復以傷寒醫訣串解手錄一通乞序於余。余不敏。每兢兢官守。尙恐才不足以經世。何暇論及衛世。然串解實補傷寒淺註所未備。不可以無傳。若再附以十藥神書註解。舍而刻之。庶可以作岐黃家祕本矣。今之術岐黃者。果能默會精審。互相參校。其裨益良不淺也。姑就林子所述其緣起。爲之弁數語於簡端云爾。

咸豐丙辰秋九月望後三日福建巡撫呂佺孫書

序

彙集傷寒淺註。凡三百九十七法。依法條晰。期於明白易曉。而又慮學者未能融會貫通。而得其要旨也。不揣固陋。復爲綜貫衍繹。名曰傷寒醫訣串解。其於疑似細微之處。抉剔詳辨。頗費苦心。修園老矣。敢謂於此道三折肱。然有志之士。誠能卽此紬繹其端緒。推尋其綱領。而不眩於似是而非。未必非活國活人之一助也。

閩長樂陳念祖修園識

傷寒醫訣串解目錄

卷一

太陽篇

卷二

陽明篇

卷三

少陽篇

卷四

太陰篇

卷五

少陰篇

卷六

厥陰篇

三九

三九

三六

三九

三九

一

傷寒醫訣串解

卷一

太陽篇

太陽爲表之經。主一身之表。

清 陳念祖修園 著

何謂太陽經症。曰。頭痛項強。發熱惡寒是也。有虛邪實邪之辨。

脈緩。自汗惡風。爲虛邪。宜桂枝湯。如八九日過經不解。如瘧狀。面熱。身癢。以其不得小汗故也。宜桂枝麻黃各半湯。因前此未汗。不得不發。其汗。因日數頗久。故小發其汗。如服桂枝湯。大汗出後。形如瘧。日再發者。以餘邪未盡故也。宜桂枝二麻黃一湯。大汗之後。不得再行大汗之法。而餘邪未盡。不得不從汗而竭之。但藥品宜輕耳。

脈浮緊。無汗惡寒。爲實邪。宜麻黃湯。如無汗煩躁者。加石膏薑棗。名大青龍湯。如乾嘔而咳。去杏仁。加五味乾姜半夏細辛芍藥。名爲小青龍湯。此二湯。卽麻黃湯之加減。總不出麻黃湯之範圍。此二法。治表中之表也。

何謂太陽府症。曰。表邪不去。必入於裏。膀胱爲表中之裏也。有蓄水蓄血之辨。

太陽病。其人口渴。煩躁不得眠。脈浮。小便不利。水入卽吐。爲膀胱蓄水症。宜五苓散。

太陽病。其人如狂。小腹鞭滿。小便自利。脉沉。爲膀胱蓄血症。宜桃仁承氣湯。

此二法。治表中之裏也。

何謂太陽變症。曰。汗下失宜。從陰從陽之不一也。

不應下而下之。續得下利清穀。身疼痛。宜四逆湯。以救清穀之裏。又以桂枝湯。以救身疼痛之表。

病發熱頭痛。脉反沈。若不瘥。身體疼痛。當救其裏。宜四逆湯。

大汗大下利而厥冷者。四逆湯主之。

太陽病。發汗太過。遂漏不止。其人惡風。小便難。四肢微急。難以屈伸。桂枝加附子湯主之。

太陽病。發汗太過。動其榮血。而衛邪反內伏。其人仍發熱。心下悸。頭眩身暈動。振振欲擗地者。真武湯主之。

已上言汗下太過。傷正而虛其陽。陽虛則從少陰陰化之症多。以太陽少陰爲表裏也。

陽盛於內。誤服桂枝湯。大汗出後。大煩大渴不解。脉洪大者。白虎加人參湯主之。

傷寒若吐若下後。七八日不解。熱結在裏。表裏俱熱。時時惡風。大渴。舌上乾燥而煩。欲飲水數升者。白虎

加人參湯主之。

傷寒不大便六七日。爲裏症。頭痛發熱。爲表症。外不解。由於內不通也。下之。裏和而表自解矣。與承氣湯。病人煩熱。汗出則解。又如瘧狀。日晡所發熱。屬陽明也。脉實者。宜下之。與大承氣湯。脉虛者。宜發汗。與桂

枝湯。

發汗後惡寒者。虛故也。不惡寒但熱者。實也。當和胃氣。與調胃承氣湯。

太陽病未解。脈陰陽俱停。停者沈滯不起也。陰陽者尺寸也。必先振慄。汗出乃解。但陽脈微者。先汗而解。但陰脈微者。下之而解。若欲下之。宜調胃承氣湯。按此脈微。卽上文脈停也。

已上言汗下失宜。熱熾而傷其陰。陰傷則從陽明陽化之症多。以太陽陽明遞相傳也。

何謂發汗利水爲治太陽兩大門。曰。邪傷太陽。病在寒水之經。驅其水氣以外出則爲汗。逐其水氣以下出。後爲黃涎蓄水。前爲小便長。

太陽爲寒水之經。邪之初傷。必須發汗。麻黃湯發皮膚之汗。桂枝湯發經絡之汗。葛根湯發肌肉之汗。小青龍湯發心下之汗。大青龍湯發其內擾胸中之陽氣而爲汗。此發汗之五法也。

若汗之而不能盡者。則爲水。水在皮下。乾嘔而咳。宜小青龍湯。發熱而煩。渴欲飲水。水入卽吐。名曰水逆。宜五苓散。汗後心下痞硬。乾噦食臭。脇下有水氣。腹中雷鳴下利者。病勢雖在腹中。而病根猶在心下。宜生姜瀉心湯。此水氣在上焦。在上者。汗而散之也。若妄下之後。自心上至小腹。硬滿而痛不可近。水與氣所結。脈遲。名大結胸。宜大陷胸湯。若項亦強。如柔痙之狀。宜大陷胸丸。蓋病勢連於下。皆注以湯。病勢連於上者。主以丸是也。若其結止在心下。按之始痛。脈浮滑。名小結胸。邪氣尙在脈絡。宜小陷胸湯。若無熱症。名寒實結胸。宜三物白散。若心下痞鞭滿。引脇下痛。乾嘔。短氣。汗出不惡寒。三焦升降之氣。

阻格難通。宜十棗湯。此水氣在中焦。中滿。瀉之於內也。若頭痛項強。翕翕發熱。無汗。心下滿微痛。小便不利者。因膀胱之水不行。營衛不調。不能作汗。宜以桂枝去桂加茯苓白朮湯治之。是水氣在下焦。在下者。引而竭之是也。

內經云。太陽之上。寒氣治之。所謂本也。本之下。中之見也。見之下。氣之標也。又曰。太陽從本從標。又曰。太陽爲開。又熱病論曰。傷寒一日。巨陽受之。故頭項痛。腰脊強。

傷寒論云。太陽之爲病。脈浮。頭項強痛而惡寒。

又云。太陽病。發熱汗出。惡風脈緩者。名爲中風。

又云。太陽中風。陽浮而陰弱。陽浮者。熱自發。陰弱者。汗自出。奮奮惡寒。浙浙惡風。翕翕發熱。鼻鳴乾嘔者。

桂枝湯主之。

又云。太陽病。頭痛發熱。身疼腰痛。骨節疼痛。惡風。無汗而喘者。麻黃湯主之。

太陽主一身之表。六經中最外一層。故表病俱屬太陽。但有表中之表。病在肌腠則有汗。宜桂枝湯。病在膚表則無汗。宜麻黃湯。兩法用之得當。一劑可愈。又有脈微惡寒。面色反有熱色而身濇。是邪欲出而未得透出。必得小汗而解。宜桂枝麻黃各半湯。又有服桂枝湯。大汗出後。形如瘧。日再發。是肌病兼見表病。宜桂枝二麻黃一湯。是二方。即上兩法之佐也。然二方能治肌腠膚表之病。不能治經輸之病。太陽之經輸在背。內經云。邪入於輸。腰背乃強。論中以項背強几几。無汗惡風。用葛根湯。項背強几几。

反汗出惡風。用桂枝加葛根湯。二方亦上兩法之佐也。但兩法俱是太陽本寒之症。故方中取用辛熱之品。若太陽標熱之自汗症。不得選用桂枝湯。宜用芍藥甘草湯。以各症與桂枝症無異。惟脚攣急獨異。是太陽之標熱合少陰之本熱之病也。無汗症。不得用麻黃湯。宜用麻杏甘膏湯。以各症與麻黃證相似。惟初起口渴發熱而無惡寒。或發汗已身灼熱不似。論雖另別為溫病風溫之證。然節首冠以太陽病三字。蓋指太陽之標熱而言。明明為一隅之舉。不讀內經。不能解也。其云桂枝二越婢一湯。為標內陷於裏陰而化熱。故熱多寒少。而脈微弱。論曰無陽。言無在表之陽也。論曰不可發汗。言不可發太陽之表汗也。故用此湯。直從裏陰而外越之也。此又可借用為上兩法之佐也。

然太陽為表而亦有裏。膀胱即太陽之裏也。如太陽病發熱無汗。而心下滿。微痛。小便不利。不宜取汗。宜桂枝去桂加茯苓白朮湯。令小便利則愈。又有發汗後。脈浮。小便不利。微熱消渴之症。又有中風發熱。六七日不解。而煩為表症。渴欲飲水為裏症。論名曰表裏症。水入則吐。論名曰水逆證。兩證俱宜五苓散。多飲煖水以出汗。此表中裏症之治法也。至若大青龍湯。因脈浮緊。身疼痛。不汗出而煩躁。為麻黃證之重者而設。小青龍湯。因表不解。水停心下而咳噎。變大青龍湯之大寒大散。而為發汗利水之劑。即是麻黃湯之加減。總不出麻黃湯之範圍。即若桂枝去芍藥湯。因桂枝症悞下。脈促胸滿而設。桂枝去芍藥加附子湯。又因前症脈不見促而見微。身復惡寒而設。桂枝加附子湯。因發汗太過。遂漏不止。惡風。小便難。四肢微急難以屈伸而設。此因大汗以亡陽。因亡陽以脫液。取附子以固少陰之陽。固

陽卽所以止汗救液也。推之汗後。病已解復煩。及桂枝症初服桂枝湯。反煩不解。刺風池風府。却再與桂枝湯則愈。其用甚廣。總不出於桂枝證頭痛發熱汗出惡風八個字之外。須知太陽治法。不外桂枝麻黃二湯。服麻黃湯之後。復有再服桂枝湯之法。服桂枝湯之後。並無再服麻黃湯之法。更須知太陽爲寒水之經。病本寒者較多。病標熱者較少。若標本兼病。亦以熱多寒少爲欲愈。治傷寒者當知所重矣。此論太陽病。以桂枝麻黃二湯爲主。一線到底。千古註家。無此明晰。外此亦卽二湯之更進一步。非離乎二湯之外而立法也。

太陽主一身最外一層。邪從外來。須要驅之使出。服上二湯。尙不能出。或留本經。或侵他經。必藉少陽之樞轉以達太陽之氣而外出也。故小柴胡湯。爲太陽篇之要劑。今人不知。擅改爲少陽主方。失之遠矣。故無論桂枝證麻黃證。若值三日。九日。十五日。少陽主氣之期。必藉其樞轉而出。或又見往來寒熱。樞不轉。現出開闔不利之象。胸脇苦滿。胸乃太陽出入之部。脇爲少陽所主之樞。默默不欲食。心煩。默默必神機內鬱。而心煩喜嘔不欲食。必胃氣不和而喜嘔。嘔則逆氣少疏。故喜也。或涉於心而不涉於胃。則胸中煩而不嘔。或涉於陽明之燥氣。則渴。或涉於太陰之脾氣。則腹中痛。或涉於厥陰之肝氣。則脇下痞鞭。或涉於少陰之腎氣。則心下悸而小便不利。或太陽藉少陽之樞轉已有向外之勢。則不渴身有微熱。或涉於太陰之肺氣。則咳者。皆以小柴胡爲主。而隨其或然之證。加減而治之。若太陽病過經不解。先與小柴胡湯。嘔不止。心下急。鬱鬱微煩。與大柴胡湯下之。以平其胃則愈。凡太陽篇有柴胡

之方。或因其病象有從樞欲達之意。而以柴胡達之。抑因其久鬱未解之邪。而以柴胡可以從樞達之。無非乘機利導之法。亦即麻黃桂枝二湯進一步之佐也。

推而言之。太陽之氣外行於胸膈。不能外而病於內。實則爲大小陷胸湯證。虛則爲諸瀉心湯證。且太陽之氣。上行而至於頭。下行而歸於腹。不能上而病於下。從背而下結於胞室。則爲桃仁承氣湯證。從胸而下瘀於胞室。則爲抵當湯證。何莫非桂枝麻黃二湯應用不用。或用之失法所致哉。蓋太陽經正治法。不過二十餘條而已。其他則皆權變法。斡旋法也。假使治傷寒者。審其脈之或緩或緊。辨其症之有汗無汗。則從而汗之解之。如桂枝麻黃等法。則邪却而病除矣。其或合陽明。或合少陽。或合三陽者。則從而解之清之。如葛根湯治太陽陽明合病下利。葛根加半夏湯治合病不下利而但嘔者。黃芩湯治太陽少陽合病而自利。黃芩加半夏生薑湯治合病而嘔者。如白虎湯治三陽合病。其云腹滿者。爲陽明經熱合於前也。其云身重者。爲太陽經熱合於後也。其云難以轉側者。爲少陽經熱合於側也。其云口不仁而面垢者。熱合少陽之府也。其云譫語者。熱合陽明之府也。其云遺尿者。熱合太陽之府也。既審其爲三陽之合。又必得自汗出之的證。而後用白虎湯之的方。斯邪分而病解。此爲正治之法。顧人氣體有虛實之殊。藏府有陰陽之異。或素有痰飲痞氣。以及咽燥淋瀝汗衄之疾。或適當房室金刃產後亡血之餘。是雖同爲傷寒之候。不得竟用麻桂之法矣。於是有旋覆代赭石湯。治傷寒汗吐下解後。心下痞鞭。噫氣不除。是胃氣弱而未和。痰氣動而上逆之症。有茯苓桂枝白朮甘草湯。治吐下後

邪解。而爲飲發之證。金匱云。膈間支飲。其人喘滿。心下痞堅。又云。心下有痰飲。胸脇支滿。目眩。又云。其人振振身瞤。劇者必有伏飲。其云發汗則動經者。言無邪可發。而反動其經氣也。有承氣湯。治傷寒六七日不大便。頭痛有熱。必衄。以陽熱太重。以此湯承在上之熱氣而使之下也。有小建中湯。以治傷寒二三日。心悸而煩。補中氣以生心血。有炙甘草湯。治脈結代。心動悸。啓腎陰以行於脈道。有四逆湯。治發熱頭痛。脈反沈。身體疼痛。扶腎陽以救其虛陷。是爲權變之法。而用桂枝麻黃等法。又不能必其無過與不及之弊。或汗出不徹。而邪不外散。則有傳變他經。及發黃蓄血之病。如中風以火劫汗。則兩陽熏灼。其身發黃。陽盛則欲衄。陰虛則小便難。甚則見發噦譫語。捻衣摸床諸危症。服藥得小便利者。方可治之。如桂枝證外不解。而熱結膀胱。其人如狂。血得自下乃愈。若小腹急結。有桃仁承氣湯之輕攻法。如麻黃證表不解。尿微而沉。其人狂。其邪反不結於胸。而直下於少腹而鞭滿。爲瘀熱在裏。又身黃。尿沉結。小便自利。不爲水而爲血。其血不能自下。必攻而始下。又有抵當湯之峻攻法也。或汗出過多。而并傷其陽氣。則有振振身地。肉瞤筋惕。爲真武湯之證。有發汗後血液內亡。身疼痛。尿沉遲者。爲桂枝加芍藥生薑人參新加湯證。有發汗過多虛其心氣。其人叉手冒心喜按者。爲桂枝甘草湯證。有發汗後虛其腎氣。臍下悸。欲作奔豚。爲茯苓桂枝甘草大棗湯證。有發汗後傷其中氣。不能運行升降而腹脹滿。爲厚樸生薑甘草人參半夏湯證。有發汗後反惡寒。陰陽兩虛。爲芍藥甘草附子湯證。且有更發汗。小發汗。論中有論而無方。亦可以意會之。是爲斡旋之法。學者宜究心焉。

卷二

陽明篇

陽明主裏。外候肌
肉。內候胃中。

何謂陽明經症。曰。身熱目痛。鼻乾不得眠。反惡熱是也。有未罷太陽已罷太陽之辨。

若兼見頭痛惡寒。是太陽症未罷。自汗脈緩。宜桂枝湯。項背強几几。桂枝加葛根湯主之。無汗脈浮。宜

麻黃湯。項背強几几。葛根湯主之。

若無頭痛惡寒。但見壯熱口渴。是已罷太陽。爲陽明經之本症。宜白虎湯主之。

何謂陽明腑症。曰。潮熱譫語。手足腋下濺然汗出。腹滿大便鞭。是也。有太陽陽明少陽陽明正陽陽明之辨。

本太陽病。治之失法。亡其津液。致太陽之熱。乘胃燥而轉屬陽明。其症小便數。大便硬。傷寒論謂之脾約。宜麻仁丸。已上言太陽陽明之症也。

本少陽病。治之失法。亡其津液。致少陽之邪。乘胃燥而轉屬陽明。爲大便結燥。傷寒論謂爲大便難。以蜜煎膽汁導之。已上言少陽陽明之症也。

病人陽氣素盛。或有宿食外邪傳入。遂歸於胃腑。傷寒論謂爲胃家實。宜以三承氣湯下之。已上言正陽陽明之症也。

陽明在經。未離太陽。宜汗之。既離太陽。宜清之。在腑。審其輕重。宜下之。若在經絡之界。汗之不可。清之不可。下之不可。宜用吐法。柯韻伯云。除胃實症。其餘如虛熱咽乾。口乾口苦。舌胎。腹滿煩燥。不得臥。消渴而小便不利。凡在胃之外者。悉是陽明表症。仲景製汗劑。是開太陽表邪之出路。製吐劑。是引陽明表邪之出路。使心腹之濁邪。上出於口。一吐則心腹得舒。表裏之煩熱悉除矣。煩熱既除。則胃外清。自不致胃中之實。所以爲陽明解表之聖劑。

內經云。陽明之上。燥氣治之。所謂本也。本之下。中之見也。見之下。氣之標也。又曰。陽明不從標本。從乎中見。從中見者。以中氣爲化也。又曰。陽明爲闔。又熱病論曰。二日陽明受之。陽明主肉。其脈俠鼻。絡於目。故身熱目痛。而鼻乾不得臥也。傷寒多發熱。而此獨身熱者。蓋陽明主肌肉。身熱尤甚也。邪熱在胃則煩。故不得舒臥也。

傷寒論云。問曰。病有太陽陽明。有正陽陽明。有少陽陽明。何謂也。答曰。太陽陽明者。脾約是也。本太陽病不解。太陽之標熱。合陽明之燥熱。以致脾之津液。爲其所灼而窮約。正陽陽明者。胃家實是也。燥爲陽明之本氣。燥氣太過。無中見濕土之化而實。少陽陽明者。發汗利小便。胃中燥。煩而實。大便難是也。少陽之上。相火治之。少陽病誤發汗。誤利小便。則津液竭。而相火熾盛。胃中燥實。而大便難矣。

陽明之爲病。胃家實也。言陽明病雖有三者之分。而其爲胃家實則一也。此節爲陽明病之提綱。沈堯封云。胃家實言以手按胃中實硬也。柯韻伯云。不大便利便。是胃家實。尤在涇云。凡傷寒腹滿。便閉。潮熱。轉

失氣。手足灑灑汗出等證。皆是胃家實。三說不同。均存之以互參。

問曰。陽明外證云何。答曰。身熱。肌肉蒸然熱達於外。與太陽表熱不同。汗自出。熱氣內盛。灑灑然汗溢於外。與太陽之自汗不同。不惡寒。外寒已解。反惡熱。裏熱已盛也。沈堯封云。此節合上一節。爲陽明證一內一外之提綱。只因有胃家實之病根。卽現熱盛汗出之病證。不惡寒反惡熱之病情。必內外俱備。方是陽明之的證。

陽明本燥而標陽。若不得中見太陰之濕化。其燥氣陽熱太盛。則爲胃家實之病。故仲景以胃家實爲一此證提綱。雖有太陽陽明正陽陽明少陽陽明之分。而其爲胃家實則一也。且更合之外證。自熱汗自出。不惡寒反惡熱。便知胃家實證。有諸中而見諸外。愈可定其爲真陽明也。其證雖有在表宜從汗解者。須知汗出多。脈微。宜桂枝湯。無汗而喘。脈浮。宜麻黃湯。二者俱太陽證而屬之陽明者。以其不頭痛項強故也。若惡寒已罷。二方必不可用。且陽明提綱。重在裏證。所以論中以此條別作一章也。

至於陽明本證。有自受證。有轉屬證。有邪盛證。有正虛證。有能食不能食證。有寒冷燥熱證。有從樞從開證。有名同而實異。源一而流分證。治之者不得其緒。如治絲而棼之也。

何謂自受。病起於陽明本經自爲之病。其外證身熱汗自出。不惡寒反惡熱。爲陽明病自內達外之表證。其有得之一日。不待解散。而二日惡寒自罷。卽自汗出而發熱。爲風寒入於陽明本經之表證。此陽明自受之大略也。

何謂轉屬。凡太陽病。過汗亡其津液。致胃中乾燥而轉屬者固多。亦有本太陽病。初得時發汗不徹。太陽標熱之氣。不能隨汗而泄。即與陽明燥氣。混爲一家而轉屬者。亦有發熱無汗。嘔不能食。其時即伏胃不和之病機。不因發汗。而自濺濺然汗出爲轉屬者。更有誤下而轉屬者。此陽明病轉屬之大略也。何以謂正虛。本篇第十六節云。陽明病。不能食。胃中虛冷。攻其熱必噦。言胃腑之虛也。第十七節云。脈遲。食難用飽。飽則微煩。頭眩。必小便難。此欲作穀瘵。雖下之。腹滿如故。此言經脈之虛也。第十八節云。無汗。身如蟲行皮中狀者。虛故也。此言皮腠之虛也。論雖無方。大抵不外溫補之法。第二十六節云。傷寒嘔多。雖有陽明證。不可攻之。以嘔則胃氣虛。雖有陽明實熱之證。不可誤攻而致死。此言胃氣虛不可下也。第二十七節云。心下鞭滿者。不可攻之。攻之利遂不止者死。論止言心下。而不及腹。止言鞭滿。而不兼痛。且心下爲陽明之膈。膈實者腹必虛。腹中之虛氣閉於陽明之部。若誤攻之。則穀氣盡而下利死矣。此言真虛假實者不可下也。第十八節云。面合赤色。不可攻之。攻之必發熱色黃。小便不利。以陽明之脈。上循於面。不知熏解之法而誤攻之。則變爲發熱色黃。小便不利等證。此言外實內虛不可下也。須知陽明證。雖以胃家實爲提綱。惟不得中見太陰之濕化。陽明愈實。而中見愈虛。前此註家。不知從此發揮。以致患陽明證者。以白虎承氣枉死幾千萬人也。

何謂邪實。論中陽明府證。皆熱邪爲病。然熱邪散漫於內外。大渴大汗。宜用白虎逐熱而生液。熱邪結聚於腸胃。潮熱譫語。宜用承氣逐熱而蕩實。二方均爲陽明府病而設。誤用之。便致殺人。第四十一節。